

Ambizius? Ambizius!

DA BERNARD CATHOMAS

Vulais vus far vossa lavur il meglier pussai-vel? Èsi impurtant per vus dad esser ina buna mamma ed in bun bab, ina buna scolara, in patrun cun stima? Na essas vus betg cuntent cun las soluziuns las pli simplas? Di quai a vus insatge dad esser respectada dals vischins? Essas vus pront da sa metter a disposiziun per pensums publics? Attenziun: Vus essas vus sin la meglra via dad esser ambizius.

Tgi che è ambizius emprova da cuntanscher renconuschientscha cun quai ch'el fa. Carlo Janka che dat tut per vegnir sin il podest, Nino che fa ina medaglia olimpica, l'autur che vul reussir cun sias ovras, l'artist che vul plaschair cun ses maletgs, l'emprendista che vul far in bun examen, il negoziant che vul far bunas fatschentas: Quai èn exempels per personas ambiziusas. Senza ambiziuns fissan bleras bunas chaussas mai vegnida fatgas. Carstgauns cun success han per regla ina buna purziun ambiziun. Senza personas ambiziusas en la politica, en las fatschentas, en il champ social, la cultura, las medias, il sport, la scienza, la scola, ... mancass bler. Ils ambizius èn ils motors. Els mettan en moviment svilup e midadas e tegnan



tras fin a la reussida. Els ristgan – er da perder.

Sche quai constat, daco sha l'ambiziun savens in tef negativ? Sco adina vai per la mesira, dentant er, co quella vegn giuditgada. Sche dus fan il medem, po in vegnir taxà sco ambizius e l'autra sco dunna engaschada per la cuminanza. As regurdaiss vus da Peter Müller che vuleva esser l'emprim en las cursas rapidas exact sco Bernard Russi? Müller valeva sco sportist plain ambiziuns negativas, Russi sco persunalitad briglianta ordaifer tuts dubis. Ambizius eran omadus, l'in en in furma simpatica, l'auter irritava; forse er già perquai ch'el discurreva dialect da Turitg?

Ina «sauna ambiziun» – Isco ins auda mintgant – è ina buna chaussa. Mo cura è l'ambiziun «malsauna» e disturbanta? Francur ch' insatge va sur tut or per cuntanscher sias finamiras ambiziusas. U er, sch'

insatgi lavura mo per l'atgna vanagloria, betg per la chaussa.

Tranter ambiziuns positivas e «malsaunas» fluctueschan ils cunfins sco adina, cura ch'i va per dumondas da gust e sentiment. Fa insatge cun tutta ambiziun insatge che plascha ad ins, accept'ins senz'auter sia ambiziun. Va ina chaussa encunter agens giavischs vegni pli difficil. Barak Obama ha battì ditg encunter il bul dad esser in «Ehrgeizling» senza perspectives e tenuta. Uss ès el president dals Stadis unids da l'America. L'entir mund quinta cun el – e cun ses «change» ambizius.

Politichers èn – sa chapescha en in bun senn – ambizius da natira. Quai è ina da lur meglras qualitads. Strusch insatge auter zuppa dentant quai cun dapli premura. Gea betg laschar sentir ambiziuns. Blocher e Maurer demonstreschan quai gist quests dis exemplaricamain. In politicher ha dad esser modest ed umilitaivel ed ha – sco els din – da purtar per amur dals auters e dal stadi quai che vegn sur dad els.

Bun ch'els han, dasper la modestia e l'umilitanza che stattan bain a mintgin, er lur purziun ambiziun. Senza quella stessan els a chasa a laschassan dar l'aria per ils lareschs.